

Kirkjuþing 2020-2021.

7. mál - þskj. 7.

T I L L A G A

að starfsreglum um starfskostnað vegna prestsþjónustu og prófastsstarfa.

(Lagt fyrir 60. kirkjuþing 2020-2021).

Flutt af forsætisnefnd.

Frsm. Anna Guðrún Sigurvinsdóttir.

I. KAFLI

Rekstrar- og aksturskostnaður.

1. gr.

■ Skrifstofukostnaður vegna starfa sóknarpresta og presta greiðist sem hér greinir. Þar sem íbúar eru:

- a. 3.500 eða fleiri, greiðast kr. 306.072 á ári.
- b. 1.500 - 3.500, greiðast kr. 327.941 á ári.
- c. 1.500 eða færri, greiðast kr. 357.091 á ári.

Auk þess greiðast vegna síma-, pósts- og fatakostnaðar kr. 187.131 á ári. Þessar fjárhæðir skulu sundurliðaðar og jafnað niður í mánaðarlegar greiðslur.

□ Héraðsprestar og sérþjónustuprestar fá greitt samkvæmt a-lið.

2. gr.

■ Til árlegs starfskostnaðar vegna prófastsstarfa greiðast til viðbótar starfskostnaði samkvæmt 1. gr. kr. 260.604.

3. gr.

■ Árlegur aksturs- og ferðakostnaður vegna prests- og prófastsstarfa er greiddur samkvæmt eftirfarandi flokkun:

I. flokkur – kr. 303.631 á ári vegna starfa:

- a. Sóknarpresta og presta með eina sókn eða fleiri og þar sem tveir eða fleiri prestar starfa saman í prestakalli.
- b. Sérþjónustupresta.
- c. Héraðspresta.
- d. Prófasta, að frátöldum þeim sem getið er í II. flokki.

II. flokkur – kr. 461.528 þús. á ári vegna starfa:

- a. Sóknarpresta á höfuðborgarsvæðinu sem starfa einir og með fleiri en eina sókn.
- b. Sóknarpresta og presta í þéttbýli eða þar sem stærstur hluti íbúa býr í þéttbýli, með eina eða tvær sóknir.
- c. Sóknarpresta í dreifbýli með eina sókn.

- d. Sérþjónustupresta sem hafa aðallega þjónustuskyldu á höfuðborgarsvæðinu.
- e. Prófasta í víðfeðmum prófastsdæmum.

III. flokkur – kr. 728.743 þús. á ári vegna starfa:

- a. Sóknarpresta og presta í dreifbýli með tvær sóknir eða fleiri og þar sem sóknir hafa verið sameinaðar og messuskylda helst.
- b. Sérþjónustupresta með fasta þjónustuskyldu um land allt.
- c. Presta erlendis.
- d. Héraðspresta í dreifbýli og víðfeðmum prestaköllum.

IV. flokkur – allt að kr. 850 þús. á ári vegna starfa sóknarpresta og presta í víðfeðmum prestaköllum.

□Biskup Íslands annast um flokkun starfa svo og endurskoðun vegna sameininga eða annarra breytinga sem áhrif geta haft, samkvæmt framangreindu að höfðu samráði við stjórn Prestafélags Íslands.

4. gr.

■Starfskostnaður vegna prests- og prófastsstarfa greiðist að hálfu vegna aukaþjónustu og veikindaleyfa en ekki koma til sérstakar greiðslur vegna sumarafleysinga.

5. gr.

■Greiðslur vegna 1., 2. og 3. gr. eru inntar af hendi mánaðarlega vegna næstliðins mánaðar.

□Heimilt er að sækja um undanþágu frá föstum mánaðarlegum akstursgreiðslum og fá í stað þess greiddan akstur samkvæmt akstursdagbók sem prófastur staðfestir mánaðarlega. Til að geta sótt um slíkt þarf að leggja fram akstursdagbók vegna þriggja mánaða aksturs í þágu prestakallsins. Biskup Íslands metur þörf viðkomandi prests á því að fá þessa undanþágu. Endurskoða þarf undanþáguna árlega. Greiðslur samkvæmt akstursdagbók geta aldrei orðið hærri en hámarksfjárhæð skv. IV. flokki. Prestur sem hyggst sækja um undanþágu skal tilkynna það prófasti.

II. KAFLI

Annar rekstrarkostnaður.

6. gr.

■Leggja skal prestum til hempu og kraga samkvæmt nánari ákvörðun biskups Íslands.

7. gr.

■Greiða skal hæfilegan kostnað vegna flutnings búslóðar milli landshluta, allt að kr. 250 þús. eftir framlögðum, fullnægjandi gögnum.

8. gr.

■ Ferðakostnaður presta á prestastefnu og vegna starfa í fastanefndum kirkjunnar er til viðbótar öðrum greiðslum í starfsreglum þessum.

9. gr.

■ Fjárhæðir í starfsreglum þessum skulu breytast í samræmi við ákvarðanir kirkjuþings fyrir hvert fjárlagaár kirkjunnar.

III. KAFLI

Gildistaka.

10. gr.

■ Starfsreglur þessar, sem settar eru samkvæmt heimild í 59. gr. laga um stöðu, stjórn og starfshætti þjóðkirkjunnar, nr. 78/1997, með síðari breytingum, öðlast gildi 1. október 2020.

Greinargerð.

Á 58. kirkjuþingi 2019, – aukakirkjuþingi – sem haldið var 28. ágúst og 4. september 2019, var samþykktur viðbótarsamningur um endurskoðun á samkomulagi milli íslenska ríkisins og þjóðkirkjunnar um kirkjujarðir og launagreiðslur presta og starfsmanna þjóðkirkjunnar frá 10. janúar 1997 (kirkjujarðasamkomulagið) og samningi íslenska ríkisins og þjóðkirkjunnar um rekstrarkostnað vegna prestsembætta og prófaste, rekstrarkostnað biskupsstofu, framlag til kristnisjóðs og sérframlög til þjóðkirkjunnar frá 4. september 1998. Fulltrúar íslenska ríkisins og þjóðkirkjunnar undirrituðu viðbótarsamninginn hinn 6. september 2019. Þá voru samþykktar, á grundvelli viðbótarsamningsins, ýmsar breytingar á lögum um stöðu, stjórn og starfshætti þjóðkirkjunnar, nr. 78/1997. M.a. var samþykkt að afnema lög um embættiskostnað sóknarpresta og aukaverk þeirra, nr. 36/1931, með síðari breytingum.

Núgildandi starfsreglur um rekstrarkostnað prestsembætta og vegna prófastsstarfa nr. 819/1999, með síðari breytingum, eru settar hvoru tveggja með stoð í framangreindum lögum nr. 36/1931 en einnig með stoð í 59. gr. laga nr. 78/1997. Eftirleiðis verða fyrirmæli kirkjuþings um greiðslu rekstrarkostnaðar vegna prestsþjónustu reistar á hinu almenna fjárstjórnarvaldi sem kirkjuþing hefur en einnig hinni almennu heimild til setningar starfsreglna sem er að finna í áðurnefndri 59. gr. Best þykir fara á því að setja nýjan bálk starfsreglna um starfskostnað vegna prestsþjónustu og prófastsstarfa. Lagt er til að heiti starfsreglnanna verði starfsreglur um starfskostnað vegna prestsþjónustu og prófastsstarfa. Fallið er frá því að nota hugtökin „embætti“ og „embættiskostnaður“ og þess í stað rætt um þjónustu, störf og starfskostnað.

Helstu breytingar frá gildandi starfsreglum eru þær að texti er einfaldaður þar sem þess er kostur og allar fjárhæðir eru uppfærðar til ársins 2020. Kirkjuþing mun síðan eftirleiðis ákvarða fjárhæðir starfskostnaðar árlega.

Lagt er til að fellt verði brott sérákvæði í 2. gr. núgildandi starfsreglna um presta erlendis. Vegna mismunandi aðstæðna og þjónustusamninga sem kunna að vera í gildi á

hverjum tíma s.s. við utanríkisþjónustuna og heilbrigðisyfirvöld, verður biskup Íslands að hafa svigrúm til að meta hverju sinni hvort – og þá hvernig – kostnaður vegna þessara starfa er greiddur. Þá er lagt til að fellt verði brott ákvæði um sérstakar greiðslur til presta við sameiningu prestakalla. Þess í stað verði kveðið á um að biskup Íslands annist um flokkun starfa svo og endurskoðun vegna sameininga eða annarra breytinga sem áhrif geta haft í samráði við Prestafélag Íslands.

Lagt er til að ákvæði um búferlaflutninga verði breytt á þann veg að skýrt sé að greitt verði vegna flutnings búslóðar milli landshluta í stað þess að tala um „búferlaflutninga“. Þá er sömuleiðis lagt til að sett verði þak á greiðslur þannig að greitt verði allt að kr. 250 þús., eftir framlögðum, fullnægjandi gögnum.

Lagt er til að 10. gr. gildandi starfsreglna falli brott. Þar segir: „Biskupsstofa stendur skil á tryggingargjaldi vegna greiðslna fyrir akstur og embættisklæði samkvæmt 3., 6. og 8. gr.“

Óþarft er að taka það fram í starfsreglum að greiða skuli tiltekið opinbert gjald þ.e. tryggingargjald, þar sem það er lögboðið.

Um einstakar greinar tillögunnar.

Um 1. gr.

Ákvæðið er efnislega samhljóða ákvæði 1. gr. gildandi starfsreglna. Þó er orðalag einfaldað með því að fella niður endurtekningar á sömu orðum.

Um 2. gr.

Ákvæðið er efnislega samhljóða ákvæði 2. gr. gildandi starfsreglna nema hvað fellt er brott niðurlag ákvæðisins um greiðslur til presta erlendis.

Um 3. gr.

Ákvæði 1.-4. mgr. er efnislega samhljóða ákvæði 3. gr. gildandi starfsreglna. Þó er orðalag einfaldað með því að fella niður endurtekningar á sömu orðum eins og gert er í 1. gr. Hvað varðar 5. gr. er lagt að stafliðir b og c verði felldir brott. Þar er tilgreind sérregla sem mælir fyrir um annað greiðslufyrirkomulag en hið almenna og er bundið persónu þess sem er sóknarprestur þegar sameining öðlast gildi. Með hliðsjón af því að reglur um starfskostnað eru hugsaðar sem almennar reglur um endurgreiðslu á kostnaði við veitingu prestsþjónustu er réttara að starfskostnaður sé endurskoðaður og skilgreindur að nýju við breytingar á prestakallaskipan, á grundvelli hinnar almennu flokkunar sem 3. gr. mælir fyrir um í 1. mgr. –5. mgr. Í 6. mgr. er orðalagi breytt á þann veg að í stað flokkunar embætta er rætt um flokkun starfa og einnig er lagt til að við bætist að biskup Íslands annist um endurskoðun vegna sameininga eða annarra breytinga sem áhrif geta haft.

Um 4. gr.

Ákvæðið er efnislega samhljóða ákvæði 4. gr. gildandi starfsreglna að öðru leyti en því að rætt er um prests- og prófastsstörf í stað „prest- og prófastsembætta“ eins og nú er.

Um 5. gr.

Ákvæðið er efnislega samhljóða ákvæði 5. gr. gildandi starfsreglna.

Um 6. gr.

Ákvæðið er efnislega samhljóða ákvæði 6. gr. gildandi starfsreglna að öðru leyti en því að orðalagi er breytt lítillega.

Um 7. gr.

Ákvæðið er efnislega samhljóða gildandi 7. gr. að öðru leyti en því að rétt þykir að setja þak á greiðslur styrkja og áskilja að fullnægjandi gögn vegna flutninganna séu lögð fram með beiðni um endurgreiðslu kostnaðar vegna flutnings búslóðar milli landshluta.

Um 8. gr.

Ákvæðið er efnislega samhljóða gildandi 9. gr.

Um 9. gr.

Í samræmi við breytta skipan fjármála kirkjunnar, með hliðsjón af fjárstjórnarvaldi kirkjupings, er rétt að þingið ákvarði hverju sinni í fjárlögum, fjárhæðir samkvæmt starfsreglum um starfskostnað prestsþjónustu og prófastsstarfa.

Um 10. gr.

Lagt er til að starfsreglur þessar öðlist gildi 1. október 2020.